



*Selasa, 8 September 2020*

**JESAYA 38:1-5**



**ERLEBUH MAN TUHAN**  
**(Corona Dalam Perspektif Perempuan)**



**V**irus Corona tuhu-tuhu nge lit. Engkai maka bage isingetken, sabap lit ka nge kalak singatakenca labo lit virus e, emaka nterem kalak gawah-gawah ku ingan wisata, tiga-tiga dem, acara siaturna terbatas nggo ilakoken ibas jumlah simelewati. Corona virus 19 e, labo rekayasa politik, nina pa nina, sabap enggo melala kal korbanna. Janah amin gia mbue si malem, tapi situhuna dampakna bas daging kula pasien terjadi secara permanen nta pe erbekas nge. Memang sakit-pinakit jadi sada kebiaren kal. Sabap megati kematen jadi erkiteken lit pinakit bas kula, pinakit e labo pilih-pilihina ise pe banci kena.

Hiskia sekalak raja, arah nabi Jesaya ipersingeti Tuhan man bana maka erkiteken pinakitna mate ia. Tuhan tuhu-tuhu i bas sura-suraNa e, tapi ipernenNa nge uga tanggapenta kerna peraten Dibata e. Adi Hiskia ngaloisa alu ertoto erlebuh man Tuhan, tek kal ia maka Dibata ngasup mpepalem pinakitna. Terlebih-lebih lit denga sura-surana lako ngelai bangsa Israel selaku raja. Emaka isehken Tuhan pingko-pingkona ibereNa ia nggeluh 15 tahun nari kenca mekelek ndai. Pengalaman Hiskia enda ngajarken kita kerna hubungenta ras Tuhan. Sipemena, labo kerina pernyataan Tuhan banci ibatalken. Adina sekalak si erkiniteken ipejumpa ras sada permasalahan, tek ia maka Tuhan mperdiateken ia, Tuhan erkuah ate ras mediate nandangi perdalinen geluh anakNa. Sipeduaken, pertotonta jadi sora si ibegi Tuhan i bas sura-suraNa. Kerina si jadi bas geluhta itentukan sura-sura Tuhan bagepe pertotonta. Kita arus njagai kiniteken Alkitabiah singatakenca maka pertoton kalak si tek ergegeh kal (Jak.5:14-15), pertotonta banci ngubahken keadan, amin gia buku totonta tetap nge labo peratenku jadi tapi peratenNdu nge. Selaku Moria kitape iajuk ngidah kerina perbahanen Tuhan paksa kita erlebuh baNa.